



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 400
fax. +387 33 726 423
e – mail: info@voda.ba

Broj: **UP-1/21-3-40-522-6/22**
Datum: **23.11.2022. godine**

«Agencija za vodno područje rijeke Save» Sarajevo rješavajući po zahtjevu Javnog komunalnog preduzeća «VIS» d.o.o. Doboj Jug za donošenje rješenja o vodnoj dozvoli za zahvatanje vode sa izvorišta «Havdine» kapaciteta 7-15 l/sec a za potrebe snabdijevanja pitkom vodom potrošača na području općine Doboj Jug, na osnovu člana 139. stav (1) tačka 1. Zakona o vodama («Službene novine Federacije BiH», broj 70/06) i člana 200. stav 1. Zakona o upravnom postupku («Službene novine Federacije BiH», broj 2/98, 48/99 i 61/22), donosi

R J E Š E N J E **o vodnoj dozvoli**

1. Daje se vodna dozvola Javnom komunalnom preduzeću «VIS» d.o.o. Doboj Jug za zahvatanje vode sa izvorišta «Havdine» kapaciteta 7-15 l/sec a za potrebe snabdijevanja pitkom vodom potrošača na području općine Doboj Jug.
2. Vodna dozvola se daje na osnovu dostavljene dokumentacije, utvrđenog činjeničnog stanja i uz sljedeće uslove:
 - 2.1. Da se predmetni vodni objekti održavaju u funkcionalnom stanju u skladu sa njihovom prirodom i namjenom te u skladu sa uslovima iz ove vodne dozvole.
 - 2.2. Da se korisnik vodnih objekata brine o čuvanju objekata i uređaja na njima od slučajnog ili namjernog oštećenja ili uništenja.
 - 2.3. Da korisnik predmetnih vodnih objekata obezbijedi stalni i sistematski pregled vode od strane ovlaštene laboratorije, te poduzme sve potrebne mjere za osiguranje zdravstveno ispravne vode za piće.
 - 2.4. Da se, ukoliko se redovnim ili vanrednim analizama kvaliteta vode utvrdi da ova ne zadovoljava uslove vode za piće propisane Pravilnikom o higijenskoj ispravnosti vode za piće («Službeni glasnik BiH», broj 40/10, 43/10, 30/12 i 62/17), vodovodni sistem isključi iz upotrebe, odnosno blagovremeno i na adekvatan način obavijeste krajnji potrošači da voda nije za piće.
 - 2.5. Da se u cilju kontrole, evidencije i plaćanja količina zahvaćene vode vrši redovno mjerenje količina zahvaćene vode, a mjerni uređaj stalno održava u ispravnom stanju, odnosno redovno vrši baždarenje mjerača protoka u skladu sa propisima o mjernim uređajima. Evidenciju o mjerenjima zahvaćenih količina vode vršiti u skladu sa Pravilnikom o sadržaju i načinu vođenja evidencije i dostavljanju podataka o količinama zahvaćene vode («Službene novine Federacije BiH», broj 83/08).
 - 2.6. Korisnik je dužan vršiti redovnu kontrolu uskladištenih hemikalija i obezbijediti takve uslove koji će spriječiti zagađenje površinskih i podzemnih voda uskladištenim materijama, odnosno obezbijediti odgovarajućim tankvanama moguće isticanje hlora i drugih komponenti iz objekata i iz posuda. Takođe je dužan obezbijediti adekvatan apsorber za prikupljanje hemikalija u slučaju incidentnog izljevanja.
 - 2.7. Da se vrši stalna dezinfekcija vode hlorisanjem kao i kontrola rezidualnog hlora u gradskoj mreži a u skladu sa Pravilnikom o higijenskoj ispravnosti vode za piće.
 - 2.8. Da se uredno vodi dnevnik rada u koji će se unositi podaci o postupku hlorinacije i potrošnji svih hemikalija.
 - 2.9. Da se redovno sprovode zaštitne mjere za izvorište prema «Odluci o zaštiti vode za piće «Havdine» općina Doboj Jug» donesenoj od strane Općinskog vijeća Doboj Jug na sjednici održanoj dana 04.12.2017. godine, broj: 01-05-I-1351-3/17 («Službene novine Općine Doboj Jug», broj 05/2017).

3. Korisnik objekata treba da u cilju kontrole, evidencije i plaćanja količina zahvaćene vode vrši kontinuirano mjerenje količina zahvaćene vode i podatke o tim mjerenjima unosi u Knjigu evidencije o količinama zahvaćene vode. Korisnik objekata je obavezan vršiti plaćanje posebne vodne naknade u skladu sa članom 170. stav (1) tačka 1. alineja 1. Zakona o vodama i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada («Službene novine Federacije BiH», broj 92/07, 46/09, 79/11 i 88/12) i Odlukom o visini posebnih vodnih naknada («Službene novine Federacije BiH», broj 46/07, 10/14 i 03/16).
4. Korisnik objekata je obavezan da redovno plaća posebne vodne naknade za korištenje voda u skladu sa propisima.
5. Prava stečena po ovoj dozvoli ne mogu se prenositi na treća lica.
6. U ovoj upravnoj stvari plaćene su sve upravne takse.
7. Ova vodna dozvola, shodno članu 117. stav (1) Zakona o vodama se daje sa rokom važenja od 5 (pet) godina od dana pravosnažnosti ovog Rješenja.
8. Po isteku važenja ove vodne dozvole korisnik je dužan ovoj Agenciji podnijeti zahtijev za izdavanje nove vodne dozvole.
9. U periodu važenja ove dozvole korisnik iste je dužan provoditi sve mjere i aktivnosti propisane ovom dozvolom.
10. Ovo Rješenje može se izmjeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

O b r a z l o ž e n j e

Pravno lice, Javno komunalno preduzeće «VIS» d.o.o. Doboj Jug obratilo se ovoj Agenciji dana 30.09.2022. godine sa zahtjevom za izdavanje vodne dozvole za zahvatanje vode sa izvorišta «Havdine» kapaciteta 7-15 l/sec a za potrebe snabdijevanja pitkom vodom potrošača na području općine Doboj Jug.

U provedenom postupku dostavljena je i pregledana sljedeća dokumentacija:

- Ovjerena kopija Rješenja o izmjenama podataka u sudski registar broj: 043-0-Reg-22-000462 izdatog dana 25.04.2022. godine od strane Općinskog suda u Zenici,
- Ovjerena kopija Uvjerenja o poreznoj registraciji izdatog dana 02.09.2013.godine od strane Porezne uprave Federacije BiH-Kantonalni porezni ured Zenica,
- Ovjerena kopija Uvjerenja o registraciji/upisu u Jedinstveni registar obveznika indirektnih poreza broj: 04/1-17-1-UPJR/1-6952-2/13 izdatog dana 13.09.2012. godine od strane Uprave za indirektno-neizravno oporezivanje Banja Luka,
- Kopija Odluke o zaštiti izvorišta «Havdine» Matuzićima, općina Doboj Jug («Službeni glasnik općine Doboj Jug», broj 02/08),
- Kopija Odluke o komunalnom redu i sanitarnom minimumu («Službeni glasnik općine Doboj Jug», broj 21/05),
- Kopija Rješenja o vodoprivrednoj dozvoli broj: 05/07-25-2091-3/03 izdatog dana 22.04.2004. godine od strane Ministarstva za poljoprivredu, šumarstvo i vodoprivredu Zeničko-dobojskog kantona,
- Kopija Rješenja o vodnoj dozvoli broj: UP-I/25-3-40-581-4/17 izdatog dana 16.10.2017. godine od strane «Agencije za vodno područje rijeke Save» Sarajevo,
- Elaborat o hidrogeološkom ispitivanju šireg područja izvorišta «Havdine» Doboj Jug, urađen decembra 2005. godine od strane DD «PROJEKT» Sarajevo (na uvid),
- Glavni projekat – II faza rekonstrukcije vodovoda Matuzići, šifra: UG-445/05 - knjiga II i III, urađen maja 2006. godine od strane DD «PROJEKT» Sarajevo (na uvid),
- Kopije izvještaja o ispitivanju vode za piće iz gradskog vodovoda u Doboj Jugu i sirove vode urađeni od strane Instituta za zdravlje i sigurnost hrane Zenica,
- Kopija Odluke o zaštiti vode za piće «Havdine», općina Doboj Jug («Službene novine Općine Doboj Jug», broj 05/2017).
- Elaborat sanitarne zaštite izvorišta «Havdine» u općini Doboj Jug urađen od strane IBIS d.o.o. Zavidovići, 2017. godina (na uvid),

- Kopija uplatnica upravne takse,

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

U cilju utvrđivanja činjenica vezanih za ispunjenje uslova u smislu izvršavanja obaveza propisanih tačkom 3. iz starog Rješenja o vodnoj dozvoli (broj: UP-I/25-3-40-581-4/17 od 16.10.2017. godine) zatraženo je očitovanje Službe za prikupljanje prihoda od vodnih naknada ove Agencije po pitanju izmirivanja obaveza uplate posebnih vodnih naknada, tj. eventualnom dugu i visini duga podnosioca zahtjeva.

Na osnovu očitovanja Službe za prikupljanje prihoda od vodnih naknada od 30.09.2022. godine konstatovano je da podnosilac zahtjeva JKP «VIS» d.o.o. Doboj Jug redovno izmiruje svoje obaveze uplate posebnih vodnih naknada.

U skladu sa članom 12. stav (5) i (6) Pravilnika o sadržaju, obliku i uvjetima i načinu izdavanja i čuvanja vodnih akata («Službene novine Federacije BiH», broj 31/15, 55/19 i 41/20), izvršen je obilazak predmetnog izvorišta te je sačinjen zapisnik o izvršenom uviđaju broj: UP-1/21-3-40-522-5/22 od 17.11.2022. godine.

Na osnovu dostavljene dokumentacije i izvršenog uviđaja na licu mjesta utvrđeno je sljedeće: Za potrebe vodosnabdijevanja stanovnika (oko 1.100 domaćinstava) i privrednih subjekata na području općine Doboj Jug zahvata se voda sa izvorišta «Havdine» koje prema Pravilniku o načinu utvrđivanja uslova za određivanje zona sanitarne zaštite i zaštitnih mjera za izvorišta voda za javno vodosnabdijevanje («Službene novine Federacije BiH», broj 88/12) predstavlja izvorište podzemnih voda u akviferima intergranularne poroznosti.

Predmetno izvorište locirano je u naselju Matuzići između magistralnog puta M-17 (Sarajevo-Doboj) i rijeke Bosne (lijeva obala rijeke Bosne). Čine ga četiri bunara (EB-1, EB-2, EB-3 i EB-4), sabirni rezervoar i objekat pumpne stanice (uz bunar EB-3) koji su locirani na parcelama označenim kao k.č. broj: 476/1, 482/3, 743/6, 744/1 i 743/2 K.O Matuzići, općina Doboj Jug. Izdašnost izvorišta kreće se od 7,0 do 15,0 l/s.

U pumpnoj stanici su instalirani mjerači protoka za sve bunare, kao i zbirni mjerač protoka na potisnom cjevovodu prema rezervoarima (ukupno 3 rezervoara kapaciteta 50m³ i 2x150m³). Hlorna stanica je smještena uz pumpnu stanicu. Dezinfekcije vode se vrši gasnim hlorom.

Kompletan rad vodovodnog sistema je automatizovan. Poduzimaju se sve potrebne mjere za zaštitu izvorišta i mjere za kontrolu kvaliteta vode koja se isporučuje potrošačima.

Redovno se vrši kontrola kvaliteta zahvaćene i isporučene vode od strane ovlaštene laboratorije.

Prva zaštitna zona izvorišta «Havdine» u kojoj je lociran kaptažni objekat-bunari i sabirni rezervoar je propisno ograđena i zaštićena od neovlaštenog pristupa a sve u skladu sa odredbama važeće Odluke o zaštiti vode za piće «Havdine» općina Doboj Jug» donesene od strane Općinskog vijeća Doboj Jug na sjednici održanoj dana 04.12.2017. godine («Službene novine Općine Doboj Jug», broj 05/2017).

Podnosilac zahtjeva uplatio je posebne troškove prema Zaključku ove Agencije broj: UP-1/21-3-40-522-2/22 od 26.10.2022. godine.

Na osnovu provedenog postupka, a prema članu 17. stav 1. i 2. Zakona o vodama, u svrhu ostvarivanja prava na vodu drugim korisnicima kao i održivog korištenja voda, korisniku objekata Javno komunalno preduzeće «VIS» d.o.o. Doboj Jug, ovom su vodnom dozvolom, u tački 2. dispozitiva rješenja, propisani uslovi korištenja objekata. Podnosilac zahtjeva, kao korisnik objekata obavezan je pridržavati se navedenih uslova, u skladu sa članovima 48., 64., 66. i 116. Zakona o vodama i članovima 13. i 14. Pravilnika o sadržaju, obliku, uslovima i načinu izdavanja i čuvanja vodnih akata.

Tačka 3. dispozitiva Rješenja je propisana u skladu sa tačkama 4. i 27. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opće i posebnih vodnih naknada («Službene novine Federacije BiH», broj 92/07, 46/09, 79/11, 88/12 i 03/16) i Odlukom o visini posebnih vodnih naknada («Službene novine Federacije BiH», broj 46/07, 10/14 i 03/16).

Konstatuje se da je podnosilac zahtjeva, Javno komunalno preduzeće «VIS» d.o.o. Doboj Jug, ispunio minimum uslova za izdavanje vodne dozvole za zahvat vode sa izvorišta «Havdine» kapaciteta 7-15 l/sec a za potrebe snabdijevanja pitkom vodom potrošača na području općine Doboj Jug te je riješeno kao u dispozitivu ovog Rješenja.

Podnosilac zahtjeva je uplatio upravnu taksu u iznosu od 70KM u skladu sa Zakonom o izmjenama i dopunama zakona o federalnim upravnim taksama i tarifi federalnih upravnih taksi («Službene novine Federacije BiH», broj 06/98, 8/00, 45/10, 43/13 i 98/17).

Uputa o pravnom lijeku:


Protiv ovog Rješenja može se uložiti žalba Federalnom ministarstvu poljoprivrede, vodoprivrede i šumarstva u roku od petnaest dana od dana prijema Rješenja.

Žalba se predaje ovom organu neposredno ili preporučeno poštom. Žalba se taksira sa 15 KM administrativne takse prema tarifnom broju 3. Tarife federalnih administrativnih taksi.

Obradivač akta:

Nermina Hodžić, dipl.ing.građ.

Po ovlaštenju
Rukovodilac sektora za izdavanje vodnih akata


Haris Ališehović, dipl.ing.građ.

Dostaviti:

- Javno komunalno preduzeće «VIS» d.o.o. Doboj Jug
ul. Usorska br 124b, 74203 Matuzići, Doboj Jug
- AVP, ISV – Vodna knjiga
- Sektor 50,
- ③ Sektor 40, arhiva
- Oglasna ploča – AVP Sava